


# La Cocote û la Gripe

Conte Ardennais de Gaston LUCY



Dins l'timps, les gamins djowint bramint des farces dins l'viadje.

Çà bruti.yot dins l'viadje, dupwis des s'mwin.nes, ku la gripe astot avô là.

In djou ô matin, k'il avot djaloté su ène pèlake du nîve, lu champète è tambouré k'i falot raclôre toutes les bièsses du l'môjon. Min.me ku l'çî ki s'frot prinde avu in tchèt à l'uche, ôrot in procès.

Ç'astot in djûdi, çà, è l'dimadje, les djon.nes djins, à ruv'nant du cabarèt, d've 9 heûres, ont sté tirer la stichète du l'uche du ran des Blossy. Les couchèts ont poûssî l'uche è il ont rèchu tous les deux.

Il ont tourniké in pô dins l'cwin, pî il ont sa.yî d'rinter ou ran, mès l'vent avo r'clafé l'uche.

Il ont don fougû in pô dins la cour, la tère adjalée, pî il ont n'nalé, tchèkin d'leu costé.

Des çîs ki ruv'nint du l' chîje duvè 11 heûres, les z'ont vu è il ont fwê r'luver les Blossy.

*Çu n'è nin à vô, les deux couchèts ki s'pourmon.nat pa d'lé la scole. Deux grands mêg' couchets, ki r'san.nat bin ô vôs.*

Les çîs k'avint fwê rul'ver les Blossy, ç'astot les çîs k'avint lôrchî les couchèts, mès i côzint à tchandjant leu vwâ.

*Ki k'z'astèz, dit-i l'vî Blossy ? Mès, i n'ont nin ruspondu.*

Kan l'vî è vû çà, i s'è r'coûrchî. In moumint après, à v'là ène ôte ki vint r'fwêre la min.me coumission.

*Rulûv'tu, dit-ill' la Tazîe, çà n' tu cousses rin d'y aler vèye!*

Lu père Blossy su r'lûve don; i va vèye ou ran, wèt l'uche ô lôdje, la tch'fy.îe tirée, è les couchès vô.yes.

I crê à sa fame :

*Vins m'édi ! les couchèts sont rèchus. Dju vons awè in procès.*

La lantchêne à l'mwin, voul la vo.ye après les couchèts. Ou d'bout d'ène boune dumi-heûre, il atind grougnî d'in costé. Cand les couchèts ont yu vû la lumîre, il ont sêwé d'peû dins les ha.yes.

Su ç'timps-là, la Tazîe s'avot aprêté è la v'là vô.ye du contrêre costé, à criant:  
*Z'ôz r'trouvé les couchèts, ôh, Zande ?*

Tout d'in côp, à toupinant du drète è d'gôtche, ill' wè ène lantchêne k'alot è ki v'not dins les hà.yes. ill' è gangnî ç'cwin là è kan ill' è sté raprotchê, ill' è cri.yî :

*C'è vous !, Zande*

*A.y, c'est mi, mès nu crîes nin coume in vèchô ! Va putot kê lu p'tit Batisse, i n'è nin co si gôtche; i m'êdrè à les r'mète. Tu r'vêrès avu lou. I nous fôtè bin nous trwàs pou les rawè. C'èst bon ki gn'è ène putite pèlake du nîve, ca i fwê nwâr coume dins in four è on z'adjale du frèd.*

Mês, la Tazîe n'boudjot nin d'place. Ill' bawiot sins arèt:

*E bin !, c'è k'tu fwê là ?*

*Va û k'dju t'ê vo.yî, putot ! dit-i l'Zande.*

*D'jê trop peu, dju n'ôz'rso y aler tout'seule.*

*Bin!, dumère çillé avu la lantchêne pou ôrder les couchèts. Dju s'rê bintto rarivé.*

*Dju n'ôz'ros d'mèrer çî-dlé non pu, toute seûle, par nute.*

*Ah! Mile çî d'mile là, k'y dit l'Zande, coumint k'on è pu z'esse bièsse a c'pwint là, pou s'embarasser d'in flè.yô parèy.*

Les hurlumints nu f'jint nin rentrer les couchèts è l'timps passot à bawiadjes.

*Choûte,dit-i l'Zande, t'sè à tchwazi, il a fôt yink du lé les couchèts è yink k'arva, mès nin deux à l'min.me place ! Tu d'mère û t'arva ?*

*Dj'îrê avu vous, là, Zande.*

E il è falu k'ill' ruvinje.

Il ont sté bouchî à l'uche du P'tit Batisse pou l'fwêre rul'ver, mê ç'ti-çi n'è nin boudjî. La fame è dit k'il astot malôde è k'i n' sôrot s'luver.

Les v'là don r'vô.yes tous les deux à l' trake ô couchèts.

Après z'awè martchî ène heûre dins les hà.yes, i n'n'ont tout d'min.me ro.yu yink, k'il ont ramon.né ou ran avu bin du mô.

Mês, l'ôte, éyû k'il astot ?

Les v'là don vô.yes ruvèy après l'deujime. Ene dumi-eûre du trake, pont d' couchèt. Ene heûre du trake, co pont d' couchèt.

La Tazîe bra.yot: *Eyusse k'il è bin pâssé, nos' couchèt ?*

*Alons, fous nous la pê! nom des noms d' vîe coulière!*

*Ah!, mon Diu toudis !*

*Choûte bin, k'i dit l'Zande, tu vas t'nu la lantchêne è tu m'lum'rès, dju vons aler r'kê l'ôte couchèt ou ran, è dju l' ramon.n'rans çidlé. Putèt' k'insi, dju r'trouv'rans l'ôte.*

Les v'là rarivés ou ran, mês l'uche éra à pon.ne ô lôdje, ku l'prêmî couchèt è bizé dins les pachis. Lu deujime, lou, les avot sî è i rarivot drî leus talons.

I l'ont fwê rinter, mês kan i s'è vû tout seu, il è pèté au diâle d'éne ôte costé.

Lu vî déjurot, la vîe tchulot, è les couchèts courint.

Çu n'è ku cand il è fwê clér k'il ont ruv'nu d'z'ès min.mes.

Les Blossy n'n'avint co passé yène, du nutîe.

Heureûs'mint ku l'champète avot des doutances è ki n'è ni volu s'moustrer!

Gaston LUCY .